



Cumün da vaschins Zernez

Protocol

Radunanza da vaschins da mardi, als 30 avrigl 2019, a las 20.00, i'l center cumünal a Zernez

Preschaints: 20 vaschinas e vaschins cun dret da vuschar

S-chüsats: Mirco Depeder, Duri Thom, Fritz Felix, Fabian Schorta, Trudi Clavuot

Tractandas:

1. **Salüd e bivgnaint**
 2. **Tscherna da duos scrutinaduors**
 3. **Protocol da l'ultima radunanza da vaschins dals 27 favrer 2018**
 4. **Vendita da terrain per schlargiar la via dal Pass dal Flüela suot Chant Sura**
 5. **Cumpra da la chamonna da militar «Fop da la Scotta» sün la parcella 2494 «Murtera – Gonda Grossa» per ün predsch da fr. 4500.00**
 6. **Orientaziuns e varia**
-

1. Salüd

Il president salüda la radunanza e giavüscha la buna saira. El constatescha cha la bannida es ida oura sco üsità e cha la radunanza es abla da decider. El preschainta la glista da tractandas e lascha approvar quella da la radunanza.

2. Tscherna da duos scrutinaduors

I basta cun ün scrutinadur e sco tal vain tschernü Jon Andrea Könz.

3. Protocol da la radunanza dals 27 favrer 2018

Il protocol es stat expost illas assas nairas e sülla pagina d'internet dal cumün. El vain approvà sainza discussiun.

4. Vendita da terrain a l'uffizi da fabrica chantunal per schlargiar la via dal Pass dal Flüela pro las stortas suot Chant Sura

Il president preschainta la tractanda. L'uffizi da fabrica chantunal ha fat la dumonda da pudair cumprar 475m² terrain a francs 2.50 per l'intent da schlargiar la via pro las duos stortas suot la chasa da Chant Sura. Implü fa il chantun quint eir quista vouta da tour a fit terrain d'ürant il temp da fabrica.

Hermann Arquint fa la proposta da na dar il terrain sco pro l'ultima dumonda, ma da trar tras l'expropriaziun giudiciala. Quai voul el verer sco segnal invers il chantun causa chi nu dà ingün progress pro'l proget dal sviamaint Susch. Fingià avant bundant ün on as vaiva sbüttà in üna prüma radunanza üna simila dumonda da vendita da terrain per fabricar üna via da support al cumün da Susch culla motivaziun chi nu fa sen da schlargiar in davoman las vias da support al cumün, scha la situaziun da trafic in cumün nun es scholta.

La suprastanza vaiva fingià ouravant discuss la pussibilità chi vegna darcheu fatta üna tala proposta. La suprastanza vaiva decis da's declerar bainschi pronta da scriver in quist connex üna ulteriura charta a cussglie governativ Mario Cavigelli, ma da na sustgnair üna proposta da na vender il terrain pel schlargiamaint da via sül Pass dal Flüela.

Our da la radunanza vain giavüschè cha üna tala charta vegna scritta cun copcha al cumün politic ed i vain deplorà cha quel nun es preschantà uffizialmaing a quista radunanza. La suprastanza es perincletta da scriver la charta cun copcha eir al cumün politic.

La radunanza decida cun 14 cunter 6 vuschs da vender il terrain correspondentamaing a la dumonda da l'uffizi chantunal da construcziun e da dar a la suprastanza l'incumbenza da sriver üna charta al chantun arreguard il sviamaint da Susch.

5. Cumpra da la chamonna da militar «Fop da la Scotta» sün la parcella 2494 «Murtera – Gonda Grossa» per ün predschi da fr. 4500.00

Il president preschainta la pussibilità da cumprar da la confederaziun la chamonna manzunada e metta in discussiun la proposta.

Mattias Müller propuona da na pajar per la chamonna e da surtour quella be sch'ella vegna regalada. Annursina Platzer s'infuormescha davo las trattativas chi sun gnüdas fattas in quista fatschenda cun la confederaziun. Quellas sun gnüdas fattas dal cumün politic e pür la dumonda sco ch'ella es uossa gnüda preschantada, es lura gnüda surdatta al cumün da vaschins per trattar. Tenor plüs votants in radunanza nun es quel agir in uorden. Scha ün tal oget as rechatta sün territori dal cumün da vaschins, dessan eir las trattativas gnir fattas dal cumün da vaschins e bricha dal cumün politic.

Davo la discussiun es la proposta da cumprar la chamonna pel predschi preschantà gnüda acceptada cun 16 cunter 4 vuschs.

6. Orientaziuns e Varia

Il president da vaschins, Rico Zala, orientescha a la radunanza sur dad oters affars dal cumün da vaschins:

- Chamonnas in proprietà privata chi stan sün terrain da cumün dessan in avegnir tuottas avoir ün contrat da dret da fabrica inscrit aint il cudesch fundiari. Quai vala tant per dumondas novas per chamonnas d'aviöls, sco eir per renovaziuns o prolungaziuns da drets existents sco eir per rimplazzar contrats existents sainza inscripziun i'l cudesch fundiari. Per chi nu possan gnir s-chaffits pregüdzis voul la suprastanza suottametter a la radunanza contrats da muostra ed ün reglamaint chi vala per tuot las chamonnas e far ün müdamaint da la constituziun dal cumün da vaschins, da maniera cha la suprastanza po tenor quel reglamaint trattar las singulas dumondas. La fatschenda vain uossa trattada dal cumün politic e da la suprastanza da vaschins e vain sclerida juridicamaing.
- La prosma radunanza da vaschins es previssa la saira da la radunanza da rendaquint dal cumün politic, subit davo quella. Tractanda sarà il rendaquint dal cumün da vaschins. Tenor l'uffizi da cumüns sto gnir fatta üna contabilità dal cumün da vaschins eir scha quel nu posseda üna chascha ed il cumün politic ha l'usofrüt da tuot il possess. Uossa vain fat ün quint cun las sortidas annualas pel cumün da vaschins e las entradas in connex cun taxas da dret da vaschinadi. Il cumün politic sto lura surtour minch'on il deficit dal quint chi resulta. Quel quint chi'd es plüost üna chosa fuormala per mans da l'uffizi chantunal da cumüns vain lura revais e fat bun cul quint cumünal in üna radunanza da vaschins la listessa saira.
- Il president orientescha davart da trais natüralisaziuns simplifichadas, las qualas vegnan trattadas da l'uffizi federal e da las qualas il cumün da vaschins ha be da tour cugnuschtscha.

Suot varia vegnan fattas duos propostas:

- Jon Martin Felix fa attent cha schi vegna scrit al chantun ed al cumün politic üna charta arreguard il svamaint da Susch, schi chi dess gnir scrit eir arreguard il privel sün via pels peduns tras Susch e giavüschà da far daplü controllas da svelteza e cha'l cumün dess metter la tabla d'avertimaint da sveltezza sün la via chi aintra in cumün da la vart vers Zernez e na sü da Grava cur cha'l Pass dal Flüela es serrà.
- Curdin Duriet propuona da dar a duonna Grazyna Kulczyk chi ha realisà il Muzeum a Susch il dret da vaschinadi d'onur. La suprastanza piglia incunter la proposta e fa sclerimaints in chosa.

La radunanza po gnir serrada a las 20.45.

Il president:

L'actuar:

Rico Zala

Hermann Thom